

四庫全書

集部

欽定四庫全書

方麓集卷六

明 王樵 撰

記

鎮江府重脩學記

國家稽古養士非孔子之道弗講廟學徧於天下百餘年來文教大興乃至繕完之事所以尊嚴教化之宮而變其學者之耳目者亦無所不舉鎮江府學創自某年

脩在某年至嘉靖癸亥太守南昌吳公議更新之而未就四明秦公繼之惠洽人和厥功告成廟學齋廡莫不完美先是教授猶未有廨至是亦成教授徐君詣予以記請辭弗獲則姑誦所聞以告焉曰昔者武王不云乎惟天地萬物父母惟人萬物之靈亶聰明作元后元后作民父母又曰天佑下民作之君作之師以是知君有父母之道焉有師道焉由父母之道故分之五等邦君以至大夫師長皆所以父母乎民也由師之道故自家

塾黨庠序以至國學有所謂以賢得民以道得民者
皆所以師乎民也治世之教上主之而父母君師無二
道道德之寄在庠序而政理從此出焉此先王所以盛
也自王教衰而學校之官名存而實廢孔孟之時道德
之寄不在庠序而在山澤師儒弟子之相得不出於大
君父母之所睽而出於下之所自為以扶王教之廢則
既一變矣然斯文猶有所寄也自有異說之譁祿利之
誘人遂以學校果無與於道德政理之實而師之所教

弟子之所學者不越乎言語文字之間權謀功利之習其間有志者則又惟釋老之是歸以為真足以洗心繕性而賢於俗學之汨沒也於是學校之僅存而不至於遂廢者無幾嗚呼此豈先王立教立師之本意亦豈聖人作君作師作民父母之本意哉故明道程先生建言於宋則欲悉心推訪天下之士有明於先王之道德業充備足為師表及篤志好學材良行修者萃於京師以大臣之賢者典領其事俾朝夕相與講明正學尊者為

太學之師次以分教天下之學者先生自謂從其言則
民風再淳王道可復願其君萬世行之信乎萬世一時
也仰惟我國家建學造士推擇師儒亦何嘗不以所謂
德業充備材良行修者望之歟在人之自待何如耳蓋
明道先生所謂正學者以為其道必本於人倫明乎物
理其教自小學灑掃應對以往修其孝弟忠信周旋禮
樂其要在誠乎身而適乎世用自鄉人而可至於聖人
具有節序愚以為師以是教弟子以是學然後可以成

人材而厚風俗濟世務而興太平公卿百官皆得其人而父母之道豈不賴師道之立而益光歟如其不然而卑者溺於章句高者驚於玄虛經賊文妖如晦庵朱子之所斥勤一生以求道而拾先賢所棄以自珍反肆詆罵如近日整庵羅公之所言是謂教非所教學非所學一旦居於民上非舉其弁髦而盡棄之則以其學術為人害也謂如父母師帥之義何哉願吾黨之士勉焉毋蹈斯戒則於今日作新之意為無負而有光矣吳公名

一瀾南昌人庚戌進士秦公名淦慈谿人癸丑進士徐君名邦佐浦城人丙申廷試貢元

金壇縣重修學記

學校之設我朝為盛宋有天下三百年至仁宗慶厯三年始詔天下皆立學而州邑猶多不能應詔我朝自洪武初孔氏之宮即徧寰宇雖武衛邊裔絃誦不絕文至今日可謂極盛矣金壇在江南諸邑為稍僻民風近樸士習近本先年文采或不逮吳下今則材俊之士彬彬

輩出矣所憂者固不在文之不足也萬厯癸未邑侯許公暨學諭林君既新其學自先師廟廡以至登講之堂退習之舍莫不完美屬樵記之樵惟古者自鄉以至於國莫不有學子夏以為士之於此猶工之於肆也士非此無以致其道士之所以貴於學也然學而不致其道則猶之居肆而不成其事其得謂之善學乎而孔氏以往致道之士何寥寥也古者正學外誘猶為兩途自有科舉之學而學者惟利祿之為志則是為一途矣此豈

國家設學之初意哉乃學者自失之爾誠使所學在身
心而非口耳則雖科舉不足以妨功若其為人而已則
雖博聞強識不免為喪志子曰文莫吾猶人也躬行君
子則吾未之有得又曰吾無行而不與二三子者是丘
也夫聖人之道不離乎日用之間默而識之者顏子也
故其居聖門不違如愚而德進薰陶而已隨事精察而
力行之者曾子也故其一旦有悟而告門人則曰夫子
之道忠恕而已矣公明宣學於曾子三年不讀書曾子

問之公明宣曰宣見夫子居庭親在叱咤之聲未嘗至於犬馬宣說之學而未能宣見夫子之應賓客恭儉而不懈惰宣說之學而未能宣見夫子之居朝廷嚴臨下而不毀傷宣說之學而未能宣說此三者學而未能宣安敢不學而居夫子之門乎吁是可以知聖門之學矣其他弟子雖所至有淺深要皆所趨不悖於聖人而有致用之實如齊伐魯冉有帥左師樊遲為右與齊戰有功季康子問曰子之於軍旅學之乎性之乎對曰學之

孔子此見聖門之學文武同方有事則執干戈以衛社稷無非實用亦無非學也孔門之後漢人所聞雖淺猶多質行之士自辭章盛而佛老又乘其蔽聰明材辯之士不馳於彼則溺於此知非不高說非不玄而守恆不足其於富貴貧賤之際養廉遠恥之意少而偷合苟得之行多有如曾子固之所譏者子固以為漢之士察舉於鄉閭故不得不自謹今之士選用於文章故行多不逮然今雖以文取士而察舉之意亦未嘗不行於其間

崇正學迪正道所以丁寧於璽書者非欲察舉於其先
耶亦顧人之自待何如爾先輩羅文毅公有言曰象犀
珠玉珍怪之物有司必程其良而後敢進焉況人才乎
夫珍寶之物不負其取負其取者乃詩書禮樂之士吁
吾人誠能因斯而有省焉使他日稱曰金壇多實勝之
士自某人始不亦偉與是為記

臨川二太守祠記

臨川二太守者宋王公安禮吾明吳公撫謙也皆嘗守

鎮江皆臨川人故郡人有遺思焉按史王公字和甫荆國文公安石之弟也早登科初從河東唐介辟呂公弼薦於朝神宗召對欲驟用之以安石辭而止嘗以直集賢院出知潤州歷官至資政殿學士出入中外所至有聲蘇軾以作詩見謂誹謗下御史獄勢甚危無敢救者安禮從容言自古大度之主不以言語罪人軾以才自奮謂爵位可立取顧錄錄如此其心不能無歎望今一旦致於理恐後世謂陛下不能容才軾由是得釋彗星

見詔求直言安禮上疏曰人事失於下變象見於上陛下有仁民愛物之心而澤不下究者左右大臣不均不直謂忠者為不忠不賢者為賢乘權射利為足以干陰陽而召變異也願深察之徐禧計議邊事安禮曰禧志大才疎必誤國事及永樂敗書聞帝曰安禮每勸朕勿用兵少置獄蓋為是也是時荆公當國和甫所言皆不黨所親有忠直之節然則不但其施於鎮江者為當百世祀而已也吳公以其鄉人高山景行仰行有日矣故

夫女之美者衆嫉其蛾眉士之賢者人慕其眉宇而不
及口鼻耳目則眉豈輕於衆體哉蓋衆體皆有用眉安
於其上雖無有為之事而實瞻望之所趨焉其有類乎
君子者矣世方以僕僕為忠察察為智安重而為國之
望者則以為無用楊君亦有感於是歟讀之為之太息

題王氏述訓後

方希古

師弟子之教不立世之學者一變而為陳相再變而為
逢蒙由蒙而變不至於羿之為不止也其漸豈不可畏

哉予過梁宋間觀河洛之俗可駭焉至汜水見河南按察僉事王侯履道所為述訓歷記成童時所從之師以致不忘之意其情辭忠厚有足感人者嗚呼薄夫惡子觀乎此其尚知所愧恥而感慕也哉

明文衡卷四十六

欽定四庫全書

明文衡卷四十七

明 程敏政 編

題跋

· 題王維畫輞川圖

王叔英

右王維輞川圖僊居盧氏之家藏也間以求題於余余不知畫固不敢妄論然世自有識者亦不假於予言若維之事則有可言者維號文學之士其於出處之節君

臣之義固嘗聞之矣當玄宗之季非可仕之時亦非難
隱之日而維官為給事中又無一言一事裨益當世顧
獨以能詩畫稱則末矣及祿山之亂陷於賊中又不能
死則其罪益大有不容誅矣夫君子之出處內以視其
外之可否外以視其時之治亂而進退行藏之機決焉
如維者其才既如彼其下其時又如彼其汙耕稼漁樵
以自給可耳而乃挾技能之末叨爵位之榮是又不可
徒以昧出處言之矣使其不遭寇亂汙節未彰君子蓋

舉矣萬歷壬午東陽許侯自績溪以賢改任金壇聰明
正直事事練達而和易從容務盡下情尤重於用民之
力邑中凡三大役令出而民歡趨之自倭警以來南北
水門雖設而舟楫罕通闌閘之水壅而不泄又金壇地
勢一雨經旬則平疇已潦一旱逾月則溝澮盡涸不但
為農田之患亦為運道之憂近例以冬底起運正水涸
之時以故荆溪歲歲築堰浚淺役無已時貫城之渠復
一支繞城而東以會於龍山之下江湖由是以達於岳

陽之上資溉引馬自上流多阻而江潮不至則南鄉亦
憂旱矣許侯之來首浚諸渠次通兩關兩關劉莊襄公
所經營素稱壯固然而土石之情聚合衆材相倚為固
歲久不相為用則必有崩動之虞乃撤而新之虛其上
而加崇廣其下三分其深而厚築其基上可通車馬下
可通舟楫一如丹陽之制經始乙酉之二月農時起而
罷南工既畢乃及於北穡事畢而成辱侯見屬為記樵
惟春秋常事不書惟闕於民力則書之邑城自唐至我

朝經數百年自正德之初至嘉靖自嘉靖至今又經數十年始一修事既非常而許侯之用民又可法皆可書也用備書之以告來者許侯諱弘綱浙之東陽縣人登萬歷庚辰進士

文昌宮戴公祠記

天文志云斗魁戴筐六星曰文昌宮世有文昌之祠而屬之道家不知其所從起戴公者唐容管經略使諱叔倫也為吾邑先賢既祀於學矣而復有祠於此者因其

舊也按史公字幼公師事蕭穎士最知名劉晏管鹽鐵
表主運湖南遇楊惠琳反刼之不可奪曹王臯討李希
烈表置幕府付以府事試守撫州刺史以民俗常爭水
溉田為作均水法人便利之耕餉歲廣尋即真賜詔褒
美又嘗以屯難未靖所急者兵食其責在州縣而有司
銓擬循情殊非為官擇人之道勸執政一以殿最升降
執政齊映等服其言而莫能用遷容管經略使綏懷夷
落威名遠聞德宗嘗賦中和節詩遣使賜之代還卒於

道然則俗傳公晚從黃老之道者其說偽矣今太虛觀
相傳為公之故宅去公墓不里許舍宅為觀事容有之
道流因而祀之文昌之側意者由此遂以生謠耳舊在
三清廡下中表于君東讀書觀中改立祠於觀之東正
其位而弘大其制別為之門不復附於道流云嘗感異
夢既而其子登科因倡此舉而求予為記予惟世俗祠
禱僭越誣妄者道家為甚既未能革當著其非以解人
之惑因為之記而特詳於戴公者以先賢遺蹟多湮惟

公祠墓近在耳目間故得不廢因以表之亦以見于君之舉不專為禱祠而崇仰前哲示準後人之意固於是乎在也

崇真院藏經閣記

崇真院藏經閣舊曰玉皇閣道士路元高倡其徒重修焉而請記於予予為更今名而著其說以正俗繆遵典制也夫玉皇者上帝也天地百神之祀領在天子之禮官豈人間所宜瀆况介居老子之宮而人其象其褻天

甚矣象設起於佛家而道家效之佛以本性為法身德業為報身本一人爾而分為三身駢列三像既失其指矣而道家三清則倣其失而又失焉者元始天尊既非老子之法身太上道君又非老子之報身道本無名豈有像乎而老子又自為太上老君且老氏自謂其道生天地而遂僭居上帝之上此豈老子之意哉抑其徒之罪也我聖祖釐正祀典凡前代不經之祀封號塑像一切革去惟浮屠老子之宮未盡然者蓋有所待也在

知禮者正之而已老子之教如清淨無為張留侯曹相
國師其意而因應不擾則足以致治如載營鬼抱一無
離安期生魏伯陽之流得其法以引內養性則足以延
年此二者未嘗得罪於名教也其後方士羽客舍鍊養
而言服食又其下舍服食而言符籙自此厭禳祈禱科
教繁興與巫祝同塗則不惟清淨無為之說略不能知
其旨趣即所謂鍊養服食之事亦未嘗過而問焉矣而
皆自托於老氏以行其教故吾以為道家之言其得者

可存其失真者可去今取道德五千言而下存其不失
真者凡若干卷藏之此閣使其徒奉其教者知所尚焉
亦非無補也崇真院香火甚久而道士多貧元高得施
予不私一錢故人樂成其事其修此閣二年積材一年
畢工三面易甃以甃在其教為有功然在吾道不免為
蠹吾道士農工商各修其業期無廢壞可不假於人而
足其有益於人甚大是吾所望於吾人云

使蜀記

嘉靖戊申蜀成王薨上命崇信伯費煒致祭樵以行人
掌行喪禮崇信伯江行予因得便道過家省老親老親
不欲予江行予遂由京口渡江趨睢陽路過大梁不入
城以公事急啓辭周王而去過洛陽風土甚佳真帝王
之宅然都洛者必如周人之制洛邑與宗周通封畿宗
周鎬京也方八百里八其八為方百里者六十四洛邑
成周也方六百里六其六為方百里者三十六東西長
而南北短短長相覆為千里庶乎形勢土中可以兼得

之故周公營洛取朝會之便四方來者道里均而已而
成王卒不果遷意可見矣蓋關中實洛陽之根本物力
氣勢合則完分則弱周之東遷割根本以畀秦所以遂
衰而不復震也瀕河之山多純土無石其土極堅暑不
蒸雨不崩高崖絕壁之下往往有民居成聚落皆窟居
也絕無室廬長子孫通昏姻各自得也可想古陶復陶
穴之風也函谷有新舊二關舊關在靈寶縣南老聃西
度田文東出皆此關也新關在新安縣東二里項羽坑

秦降卒處漢樓船將軍楊僕有功恥為關外人上書乞
以家財東徙關武帝為移於此關中據天下上游潼關
雄勝亦稱冠絕崇山天險洪河天塹真有俯視八州之
勢故七國時在諸侯則謂之仰關而攻在秦則曰以下
兵於諸侯如高屋之上建瓴水也過華陰華山在眉睫
間而不及登僊掌無雲秀色可挹意往而已入陝朝秦
王留宴出訪前大司馬劉公儲秀於里第別去秦王又
遣人餞於郊終南乃關中南山西起隴鳳東踰商洛綿

亘千里皆南山也而隨地異名其山深處高而長大無異名者曰秦嶺乃地絡所由分也富有異境行役有程不暇幽討山靈應笑人也漢志謂秦地於禹貢時跨雍梁二州詩風蕪秦豳兩國按秦漢都關中其疆界如此此所以全盛而強宋人不能都關中以其西北為西夏所據也曹操不能乘得關隴之勢以舉巴蜀此天下所以遂成三分向使曹操無劉備以牽其右則於沿江數出偏師以疲吳使其備多而力分奔命不暇又於上流

擣其虛孫權成擒矣唐人都闕中亦知重蜀鎮不輕畀人誠以其胞絡之睽也志又謂涼州之富為天下饒保邊塞二千石治之咸以兵馬為務酒禮之會上下通焉吏民相親是以其俗風雨時節穀糴常賤少盜賊有和氣之應賢於內郡此政寬厚吏不苛刻之所致也予讀此深有感焉誠得今邊郡皆若此於以捍敵不難矣六月入棧道棧道七百里雖有登陟之勞而塵沙溽暑為之一洗左右皆娛目快心之物或奇峰怪石泉聲琅琅

如奏金石或喬木茂林清陰夾道日光穿漏更覺可喜
或隔山別巘瀑布高懸如瀉天半或連渡數嶺間不見
人忽聞雞犬聲知有人煙至則依山高下屋居井井俗
如太古每為之停車久之乃去蜀中人物富繁物產大
類江南惟夏秋多雨雨動連旬殆所謂景朝多陰者邪
蜀藩素稱富而賢宗人少犯法親王尤厚禮士大夫然
頗習於奢予至即卻其館穀不居而居於書院時葬有
期矣而勅使尚未至王世子強予攝祭祭之日增設導

引儀衛甚盛省臺以下皆吉服陪班予獨青衣角帶而入諸君訝而問之予曰禮也諸君遂皆如予之服行禮平立三奠祝稱皇帝遣官致祭世子伏哭稽顙退就幕次見世子世子勞慰遠涉命長史延至書堂茶飯工以樂侑辭之王府不時就館設宴二長史迭來為主且曰殿下恐先生寂寥予謝曰殊不寂寥但致勞如此却似彼此勞擾也得已之更感殿下厚意矣皆悚然曰諾遂不復至留成都月餘遇暇日又不遇晴景是以諸勝有

不及遍歷者錦江環城清澈見底而不產水族時當仲
秋城上芙蓉正開爛然與雉堞相錯照映江水中先君
嘗有句云一江秋色照芙蓉可謂佳句宛如睹也謁昭
烈武侯祠古栢尚森森拂雲篴月有氣接巫峽寒通雪
山之勢浣花溪距城可十里水木環合幽谷瑤青誠為
勝絕杜少陵宋景濂先生二祠在其側杜祠即草堂遺
趾宋先生謫死茂州蜀獻王以舊學恩禮為請於上故
成都都有其祠墓而方公希直者先生門人嘗為教授於

此故以配祀焉王府既褻事予先辭還餽贖白金鞍馬
衣幣盡卻之由簡州陸路至夔州為東道無驛站行不
及城邑則旅宿山寺而夔歸山尤險惡所謂鳥道也興
人不欲前予不能違也遂從舟夔舟視江南官舟差小
而輕捷首有招竿執竿與舵師皆為重任驚濤利石之
間旋轉如意所謂捩舵開頭捷有神者也夔府孤城半
在山上闌闔無井皆沒於江東望瞿唐兩崖峻壁萬仞
對聳如門雲氣噓吸其間舟師搥鼓發船其音鼙鼙響

幽谷間別是一種舟航景况舟師以已飲勸力則櫓者
皆和之灩澦堆在瞿唐闕下當江中流九月過時大如
金山下雲根島距舟尋丈間櫓捷江平去如過鳥土人
云夏秋水盛時水又高於堆數十丈急流奔怒舟不可
上下又堆初沒時謂之灩澦撒髮亦不可過范成大詩
云不知灩澦在船底但覺瞿唐如鏡平蓋當水勢平緩
時也兩岬山皆壁立江流於中好事者有鑱天子萬年
四大字於巖際者巖竇中往往有嵌巖若文書櫝者不

詳為何物驛舍多在巖阿陡絕不可上下傳錄過所及
餽餼皆懸綆以下之時順流甚駛一日過數驛江行幸
皆晴霽巫山亦峽中一壯縣也曾一駐舟登岸散步自
瞿唐而下山皆險峭惟巫峽秀峰開列如一幅圖畫峰
有十二見者彷彿九峰餘者揜映不見一日晨興舟中
仰見一峰頂色如金耀耀奪目細視乃初日射之也峽
中非亭午不見日見此殊奇李白金芙蓉乃真景象也
嘗謂天下山川關中以雄勝錢唐以麗勝歷下以幽勝

兼之者蜀中爾過新灘避惡石登陸輿行追舟不能及
蓋其速如此過黃牛峽以羊豕禱廟廟後山巖上有如
人戴笠牽牛之狀其色赤黃俗傳黃神佐禹治江有功
故廟食於此予之茲行也以老親念予之切速往速歸
杜老云幸有舟楫遲得盡所歷妙予誠未盡所歷之妙
也予友譚敬之者嘗倅夔府問以赤甲白鹽不能對為
之拊掌一笑然則予之所得亦多矣

使代記

嘉靖庚戌予以行人奉使至大同三月風變甚異風起西北黃塵蔽天已而天作赭色人物相對其色皆赭少頃天暗如漆時方停午室中燃燭然後可坐六月二十四日大同總兵張達以禦敵陷沒張達甘肅人起小校積首功至今官善弓馬無大略狃敵入非時視為零賊輕兵逐利陷敵伏中部下莫肯救副總兵林椿以失帥慮逮突戰俱死事聞上以邊臣習於異愼欲因二將以示激勸賜張達謚曰忠壯林椿謚曰忠剛各贈官蔭子

立廟於大同逮總督侍郎郭宗臯巡撫都御史陳耀廷杖之各百謫戍遘耀死於杖詔起尚書翁萬達代宗臯未至以兵侍蘇祐暫行督事起僉都御史趙錦代耀復咸寧侯仇鸞太子太保鎮大同仇鸞者其祖仇鉞寧夏游擊將軍也以擒反者安化王封咸寧伯又以征流賊功進封侯鸞為人短小精悍粗涉文字謫誕敢大言鎮河西以總督曾銑劾其不法事被逮曾銑江都人嘗獻議謂我朝以東勝孤懸徙鎮榆林初徙時套內無敵土

地衍沃物產富饒當事之臣不以此時據河為守弘治八年敵編筏渡河剽掠官軍牧馬至十二年遂擁衆入套常駐牧不出禍根既種竊發無時出巢則寇宣大三關據巢則寇延寧甘固此剝牀以膚切近之災無已之患宜大驅逐之便答旨以銑任事慰納甚溫中外皆以為此上意也一日忽下手詔以兵力之未足取責問大臣生事造端之故內閣嚴嵩上疏謝罪因言此事皆夏言主之夏疏無引咎語上怒革言師保閣職以吏書致

仕行至丹陽逮下詔獄以仇鸞有訐疏也夏愛妾之父
蘇綱亦江都人在京出入夏私第頗用事而銑子以鄉
親往來主其家鸞因言銑緣蘇剛交結輔臣餽金二萬
載以三騾揜敗冒功建復套危計事下刑部初擬皆不
合上意上曰第如律於是坐銑以交結近侍官員與夏
相繼斬於西市仇鸞以告訐釋罪復用實無奇謀長策
不過遣人款敵令不犯已境而已時邊人籍籍言敵大
舉必犯京師蓋消息在半年之前邊人盡知而京師不

知也八月十四日敵攻古北口十六日挾牆入圍順義以保定兵駐城中城得全十七日報至京師始議守禦計兵部尚書丁汝夔奏發勇字四營兵分駐城外威字四營及三大營兵守城命文武大臣各一人分守九門檄諸鎮勤王十八日仇鸞首以大同兵至十九日巡撫都御史楊守謙以保定兵至既而諸路兵亦大集制以楊守謙為兵部侍郎提督內外官軍截殺賜仇鸞平虜大將軍印總諸路兵調度截殺鸞軍無紀律而丁汝夔

又下令禁勿捕大同兵大同兵益肆略甚於敵人始
疾汝襲矣言頗聞於上敵薄都城殺掠焚廬舍日夜
火光不絕至坐教場飲酒撾鼓為戲樂又入東直門
外馬房執內官八人去大酋諳達復縱之歸持嫚書
脅求通貢書非番字乃內逆代為之者也城外居民
被傷千百成羣奔城城門拒之號慟聲徹御在所詔
開門納之諭輔臣曰九門先閉是自困焉止是防檢
盤詰時時代之僉服聖語之當先是輔臣疏言竊聞

敵中我逆甚多昨者進邊皆穿中國衣帽假稱調來
邊軍以人口子乞聖駕暫還大內軍機貴密乞諭文
武大臣凡係密議許求面對皇上特御便殿親賜裁
決二十二日上御奉天門受朝蓋上自十八年不出
至今矣降制切責人無任事致敵如此以敵求貢事
下羣臣議國子司業趙貞吉抗言敵不可許詔加左
諭德兼監察御史出視師賫伍萬金以為便宜激賞
之用趙至軍仇鸞以計困之屢鼓於軍中若將向敵

狀拉趙監戰則衆疾馳趙不任馳馬又驚不得如所
欲乃以所賞金付鸞鸞與敵潛通揚聲追截實未嘗
望塵發一矢敵又犯天壽山繞出西山良鄉以西至
保定皆震楊守謙營城東北隅以戰關國家大計不
敢輕動上以為逗遛二十四日下尚書丁汝夔侍郎
楊守謙獄時敵漸退鸞率諸軍尾之敵欲西奪白羊
口出為白羊守將所扼復還猝與鸞遇縱騎蹂踐鸞
軍不及陣幾為所獲敵分兩道出通計男婦殺掠蓋

六十餘萬財富無計敵過宣府城下呼守陴者曰無
恐知爾兵在南爾所守者婦女城爾時守陴人見所
掠闕南人口行竟日不絕號哭之聲震動山谷力不
能救是夜敵營於西門外二三里間以久勞皆酣寢
城中無一兵可出刼其營鎮人惜之二十六日汝襲
守謙同斬西市汝襲無軍旅材用之本兵已非其任
況當此時哉使早用翁萬達則事不至此時翁居憂
病疽再以本兵召未即至貶秩出經略紫荆諸闕予

嘗歎世廟英睿不世出亦甚留心邊計而一時之臣多
負任使是時本兵之任莫如翁萬達次則王邦瑞當
張達林椿敗時當即以翁萬達代丁汝夔王邦瑞代
陳燿聞二人皆不為用事者所喜又自周尚文死後
一時邊將可謂無人不得已乃用仇鸞若冥數焉趙
貞吉復命以所言不讐又追其前申理周尚文沈束
事杖貶嶺南周尚文守邊得士死力敵人畏之然亦
頗用術數翁萬達能駕馭之其死也嚴氏沒其功不

叙寢其恤典給事中沈束論之忤旨下獄楊志學有
邊功守謙其長子也不待檄馳來不戰非其本心而
獨受誅予在大同一見仇鸞即知其奸其駐兵居庸
關下乃先知敵謀故聞警即入方上憂敵時首到城
下上使人登城視之軍行亘二十里其見寵以此後
留總京營數請北征豈有敵人吾地既不能禦其來
又不能邀其歸敵已出境反能問其罪擣其巢穴耶
不過為大言以欺上夸下且欲攬兵事在手以肆其

姦克爾使更數年不死不知作出何事然謂鸞必反則
無之鸞非能反者也姑以近事論如石亨父子亦驍勇
絕倫身經血戰建有大功然後乃生不逞之心觀鸞之
所為狐鼠爾豈能反者哉京兵皆市人操練亦空文自
庚戌變後歲調邊兵入衛然邊兵原各有地方倘賊先
出兵向彼則不可調矣又如宣大近而易調然敵東來
必先經二鎮倘知二鎮空虛乘虛入寇門戶失守則長
驅徑薄畿輔豈能自安京兵不濟緩急邊兵又不可恒

調宜募召四五枝分屯於近京要地操練防守聽調不必入京增兵不增餉但選汰老弱罷京操即以其食補此則不加賦而足矣丘文莊畿兵之說不可行唐時河北藩鎮竊據土地盡籍其壯者為兵以抗朝廷此其治世之事只用募法可也河北固健兒之數不患不足患處之無道爾有此四五枝兵京兵只當閱實不必補額外省京操可罷募補京營仍歸驕惰無益也自來京邊之軍未有統於一將者驚病始議分其權驚病劇始遣

趙錦收其印趙錦在兩鎮皆與鵞同事其入兵部也鵞援之鵞敗錦亦得罪敵之求貢也大臣議遣使探其要領因以款之幾墮宋人之誤使敵叩邊求貢來則不拒可也豈有擁兵壓境乃尋城下之盟乎世廟札諭有曰皇曾祖及景泰時曰和甚差不可聽此一言甚得義之正後仇鸞卒開馬市敵斥彼無用之馬中國償以厚利馬俵諸民間牧養隨即倒死徒為民害或言近年西北邊頗得休息亦牽於吾餌保塞守約之效祖宗時亦嘗

容其通貢徼外皆入貢何獨於彼而欲絕之不知祖宗時
兵威强盛能致其死命彼以誠來貢則因而撫之一或犯
順征討遂加故敵畏威懷德今日能如是否乎謂許貢非
講和盖亦自誑以誑人矣馬芳幼陷敵中亦稱驍將嘗
盜敵女敵愛其勇不殺而割其右耳芳自以功多宜足
以當一女子不得又以為戮殊恨之遂來歸官至都督
數出總兵敵嘗嗤之曰芳吾隸爾中國遂為大將足知
無人然敵實忌之為裨將時嘗為總督江東以軍法箭

貫耳徇於營芳恥之又欲北奔內閣徐存齋急遣人慰解
餽以千金芳乃止予在尚寶時曾見之與之語佯為侏儻
不可曉及訪其第沉酣富貴與諸帥同態寧復有沙場死
綏之志乎聞屢詣政府請外鎮不樂居中人言芳不忘飛
颺豈然哉殆料之過矣

西曹記

國初稽古建官正六卿之職以錢穀刑獄為視諸司為劇故分
其子部各十有三如外藩之數承平以來訟獄稀簡西曹號

為無事郎官日以其三時治事而以其餘挾策讀書補衙既散檜陰寂寂靜如太古有留而弗去者焉他曹僚友不常接接或以迹相拘不能相洽惟西曹燕叙以齒不以官事至分理有疑相酌政事之外道義切磋真有朋友之義焉且牘必自成不假吏手故居是官者多精於吏事刑雖一職而諸事之情偽無不在焉非通於諸事之情偽者不足以決獄予在刑部治律令如士人治本經後兩任按察皆得其力治獄之難在得情嘗譬之醫治律如按方鞠事如診病有人方書雖

明而不中病如人明法而不能得情則所謂明竟亦何
用又有人精於法而易入於刻法非使人刻也倚法以
削則入於刻而不自知故用心又以仁恕為本南城羅
惟德終日趺坐虛室生白至臨庭洞微決疑每出人慮
外此陸象山所謂精神不輕用以待有用處者與羅素
羸疾在告日多或連月不入堂官不問京山高伯宗土
木形骸敝袍布韉帶銛不完出乘款段馬誠如杜詩所
謂骨骼磳兀如堵墻者人笑之則曰馬行遲我起早何

患不與君同到晉江莊士元心無機械言訥訥不能出
辭而忠信之行可望而知其夫子所謂善人有恒者與
泰和胡正甫安福鄒繼甫同司日以講學為事朝暮升
散行坐必耦時稱江西三子三子謂羅胡鄒也羅子提
調獄事予以巡風詣之故事携酒肴夜坐羅先使止予
勿設但邀予蚤過清話相見甚歡問見荆川云何予對
以所憶大意而不能敷衍但曰靜曰靜則能見自家不
是處曰人往往認賊作子羅領之久之曰尚欲為兄有

說予曰願受教羅曰知止而後有定定而後能靜兄未
知止如何便教兄靜得予悚然起謝羅又曰知止是聖
功起腳第一步總於文義無交涉向外尋討不得試言
兄一生聰明有幾日在自家屋子裏用予蹶然大有省
羅約游西山不至貽之以詩有十里春花走馬看之句
燕都西直門外多中貴人別業時當春明衆花盛開予
以有期不及下馬住覽而空還故云羅答以唐詩二句
云誰言不同賞俱是醉花間陪祀康陵與羅惟德同宿

於神宮監耳房康陵者武宗陵也去長陵十里在天壽山最北地僻道險有事此陵者多以往返為艱是夕予豫襆被為宿計使隸覓便室未得祀畢衆轟然散道中須逐大隊不敢獨行予行止未定忽遇羅與錢君同文遂同宿羅為予言勾勾崖之勝勾勾崖在九龍池西峰之西由樵徑攀蘿而入崖半有古剎老衲子數人眉長寸餘視其寢食猿鳥也守陵庵多於此避敵云次日行經九龍池側羅指示予其處曰其峯巒甚似江南九華

山予馬上遙望不能詳諦予雖不能游而意已獨往為之作長歌河汾趙子謂予耳之羅子無異身游可名曰聽游予喜斯語前未經道遂用之前代帝王陵各一邑惟天壽山環抱如玦玦口為紅門紅門內天開地豁諸陵列焉予在刑部凡三上陵於春者再所謂八陵果園者花卉盡開遠望如霞綺陣布尤為勝景九龍池在西南隅文皇嘗駐蹕焉嘗作一詩以寫之頗盡山陵壯觀其間有山內看山山更好與燈火千林晝冠裳兩道回

之句意身經之者未必不莞爾而笑也嚴氏當國賄賂公行大小官職有價國家財力困於供邊而邊臣巧於侵盜專以餽送大半出戶部者入權門也以此邊政盡廢北敵蹂踐墩堡十殘八九又圍困大同右衛說者曰敵欲得此以處丘富丘富者中國叛人也無右衛則大同危矣於是給事中吳君時來疏劾督臣楊順本兵許論罪狀世宗為之震怒逮楊順下吏按法當斬嚴氏欲為之地又慮上窮竟邊事及已思有以中吳時吳當使

琉球未行聞嚴氏意旨遂上章攻嚴氏而刑部主事張君翀董君傳策亦同上章大旨皆謂上付政於嵩嵩付政於子世蕃一家盤據朝廷作威作福父子濟惡近代所未睹前世所未聞嵩乘此亟上章自辯謂吳時來實憚過海先論一二邊臣以嘗陛下意本在臣也臣以贊上事玄為人所嫉惟陛下矜察於是上下三人吏謫充軍遣給事中鄭茂往勘楊順事欲貸其死再下刑部予謂尚書鄭公山可移判不可改當以去就爭之鄭公謂

事不可激若如此則上怒不測何止我一人區區之去就恐啓士大夫之禍與其激上過舉寧我不能執法守議有愧於張釋之而已遂改充軍後隆慶中楊順卒論死吳張董三子之獄在浙江司莊晉江為員外郎署印予與高京山為主事堂上鄭公以莊口訥予性直兩遣高通言於西直西直者內閣直廬也在西苑時嵩勢張甚諸衙門事無不關白而後敢決三子所憂者廷杖又恐嵩密進揭帖必擠之死士大夫多懷此慮故鄭公欲

稍有以開導嵩意以保全言官成上聖德然三子所以得全者蓋是時上已察嵩之姦特未決計去之耳後高伯宗竟以三子之故陞景王府長史出嵩意也三子行時高嘗出城送贈之詩嘉靖中用法重者有數條邊方巡撫總督官係文臣舊時失事重者充軍而已後比依守邊將帥守備不設為賊所掩襲因而失陷城寨斬罪文臣比依將官自此始矣言事者自有對制上書詐不以實與風憲官挾私彈事本律後加以廷杖後又加以比

依子罵父死罪比依子罵父之法自此始也曾銑建議
復河套夏言從中主之法司以律無正條後乃引交結近
侍官員之律楊繼盛劾嚴嵩罪惡疏中援引二王法司
無以罪之乃引詐傳親王令旨之律郭希顏建請安儲
引妖言律此數者猶以干上怒上所欲重而法官不能
爭至於沈鍊在戍所罵嚴嵩與人角射象嵩為的而射
之楊順誣以妖言而殺之於是乎無天甚矣然嘉靖末
年海剛峰一疏直而無禮亦幾乎罵矣而聖度優容卒


待以不死乃知前此皆大臣不能調護之罪非世宗本心也郭希顏疏云不敢言立儲請言安儲大意欲景王出封耳而中引嚴氏乃嵩自謂闕伊家族者故摘其疏中建帝二字以觸上怒而必殺之觀其後對人曰希顏止望掣問不過充軍即論死亦不過監候他日新政便得入閣豈料聖明洞燭其姦即時殺了此言之出肺肝可照矣王直背國勾敵攻破城池殺傷文武將吏軍民無算而胡總督乃以招納為功嚴氏父子主之欲以投降

宥死衆頗惑予謂之曰寧使胡宗憲失信不可使朝廷失典刑尚書鄭公見與予同卒擬謀叛律梟示海上王直徹人據胡總督私史已稱王海曲矣此中厚有所許故彼有所恃而來實非投降也聞斬王直時衆推荆川發言王直出不孫語刑不可不盡心如近日餘姚翁公最號老法家其恤刑錄為人所傳誦而晚猶以失決一獄追論削秩餘人乎予見人多以留心案牘為俗吏專以文墨詩酒為風雅往往法律都不細觀鞠問又不

耐煩正不知如錢若水密訪女奴卒置同州富民於不
死前輩用心乃如此正是古人為學實用處於此無所
用心飽喫官飯受成吏胥而可謂之風雅乎在外有司
招案尤不堪著目姑舉二事有三人盜採人桑趙甲因
拒捕鎗截失主身死律當坐斬錢乙鎗截出救人孫丙
傷右臂右肋亦引竊盜臨時拒捕傷人之律予謂律云
臨時拒捕臨時二字正有深意蓋正竊時為事主所覺
乃不棄財逃走而護賊格鬪非強而何所以坐斬若已

離盜所因追趕而拒捕者即非臨時矣今孫丙以鄰人
聽知喧嚷出來救護則非捕盜也錢乙因怪伊出救而
行兇則非拒捕也已離桑地追趕在孫丙門首則非臨
時也只合以兇器傷人引例充軍後此人卒得減死又
一事詐為文書者按律必套畫押字盜用印信而後是
印押二者又以印為重故有例凡詐為各衙門文書盜
用印信者不分有無押字依律坐罪若止套畫押字各
照所犯事情輕重查照本等律條科斷嘉興兗州俱

有此事嘉守見予批詳極口稱服充守因予弔驗乃回
稱巡撫已詳允遂與予有隙人之不同如此



方麓集卷六

欽定四庫全書

集部

方麓集卷七

詳校官監察御史臣徐如澍

侍讀臣孫球覆勘

總校官檢討臣何思鈞

校對官編修臣勵守謙

謄錄監生臣魏高儼

欽定四庫全書

方麓集卷七

明 王樵 撰

記

遊西山記

予官京師前後十年西山凡四至一自大同出使回經
華嚴寺上翠華巖憩七真洞題詩云似我華陽洞何時
住七真問僧僧不語為拂石牀塵洞深廣可二三丈中

有石牀東有耶律楚材詩鏤於石緣厓上數折又有呂
公洞人跡罕到洞中隱隱若風雨聲蓋暗有流泉過也
出登玉泉山坐望湖亭見羣山環繞惟此山如游龍首
脊穹窿勢若將飲於湖中者諸泉或從石罅側出或從
平地仰出仰出者尤奇噴如貫珠及水面而止流而為
渠止而為湖皆清澈見底水中怪石錯落翠藻如帶時
時與淪漪相舞因行役有程遂去一因上陵取道西山
宿甕山圓靜寺此往天壽山之別道也無車馬交雜無

塵囂聒擾良自得以為比之昌平旅泊清如登僊也寺
甚幽僻出寺間步入一寺兩僧對弈不起旁有泉出於
地倚長松看其盛沸久之乃去一同姜廷善內翰騎驢
從一僕一隸會西直門並驢且行且話遇佳處即下相
與眺覽大抵西直門外多中貴人別業園亭之勝一人
一意競極新巧春時休暇大闌鼓吹導騎各適所珍為
戲樂不絕於路各有守者亦不禁人游翫予輩但至三
四處覽大都而已不能徧也是日至功德寺午飯寺據

湖山之勝弘敞壯麗宣廟數游幸焉自燬於火今存者
僧舍數楹與周垣舊殿趾可認而已臨湖有三臺尚在
湖上長堤十里平疇盈望皆依江南種稻法引水溉灌
歲收充御廩非私家可擅也跨驢度垂楊流水石橋遙
見有人指點憑欄姜兄笑謂予曰此胡正甫鄒繼甫也
至則內翰王君者亦在焉遂同游香山寺坐來青軒晚
同宿碧雲寺薄暮給諫胡君應嘉亦至焉諸君相與極
論數目予若欲有以發予之言者而予不能參一辭遂

各就室寢予與姜兄同榻王內翰同一室復論詩至夜
分姜兄曰可不語矣予猶不成寐但恐妨人不敢輾轉
一僕卧牀頭咳不止欲出語禁之復已無何聞山下鈴
聲絡繹與清寐相雜知馱煤者過矣遂獨起步庭中得
句云青山在屋上此雖舊語而實切時景但未有對蚤
與五君同游卧佛寺有別院對迴廊脩門鎖花木前山
未須往欲留佳處宿之句鄒胡二君欲先歸予遂與同
歸而興猶未盡越月再與進士趙君訥同行出西郊得

句云出門不問途但隨流水去流水自西山水盡行當
住馬上舉似趙君趙君以為佳蓋西山泉流導入大內
為太液池御溝過金水橋又東出入御河自山至都城
水門凡三十里節節有佳境予詩云年年綠樹搖春風
一道清溪掩映中幽賞供人三十里潺湲又出鳳城東
又云名園古刹貴家村往往清溪恰在門皆寫實也凡
游西山者先經玉泉諸勝而後至平坡寺平坡寺即圓
通寺最遠獨在諸山外絕磴凌蒼靄禪宮在翠微間是

日與趙君沿溪行不覺失道乃先至平坡寺晚宿碧雲
寺月正當庭二人對酌月下因足成前句云一宿招提
境琴尊此日同青山在屋上明月可庭中戶牖流泉過
池亭曲檻通高人逢不偶清賞意無窮又成游香山寺
詩云曉色開層閣春天淨翠屏檻憑千樹綠門挹四山
青遠寺分林見流泉夾路聽禪房人不到花竹晝冥冥
香山樓閣崇敞來青軒在山之半四山環拱遠寺各占
一林參差隱見此其遠景也近則憑欄俯眺而千樹青

紅盡在履舄之下茶罷各出散步任意所之前時胡鄒
二君獨入禪房花木深處登禪牀趺坐背相倚而歌予
為之賦皆寫實也予望湖亭詩有孤村數家隱樹清流
一曲抱山之句可為當時畫景時已四月至此始聞鶯
馬上誦韋蘇州聽鶯曲故又曰四月城中未有林端黃
鳥關關者此也西山諸寺多出巨閣所造費皆累萬計
觀其所出則其所入必幾倍於此而始肯斥其餘以為
媚佛之用彼安所取之乃知國家帑藏生民膏血有上

不在官下不在民為此輩所白乾消沒者恒居八九也
萬歷乙亥予赴尚寶之命再至京師時在冬月城壕枯
涸河底成蹊怪而問之土人則曰西山泉流比年微細
不足充灌予欲問之司空而未暇也諸山皆有泉在碧
雲寺者出高崖下渟而為池斲石為兩螭首高下相吐
納灌輸支引入花木間所謂截澆竹裏花分映巖前月
者也詩予又引入諸庭戶前循除流瀾瀾不絕淪者泚者
飲者隨在斟酌不煩遠汲又前會為大池石梁跨其上

金魚大者尺許投餅餌呵之大小盡浮喁喁不畏人寺
四面皆絕澗聞某年敵入鄉民收保於此趙君名訥汾
州孝義人已未進士志行高潔恬於進取仕至保寧守
即謝去其詩文有陽谿集其贈予詩曰吾愛王子猷相
逢意氣投時因在公暇追賞共林丘乃道西山事也

海岱記

予年十三四時從先君官東萊嘗一至海上泰山雖未
登道中先君每指示之初不甚了了及過魯境東方空

曠遠愈分明後讀杜詩乃知所謂齊魯青未了者為簡而盡也嘉靖庚申待罪按察又得奉遺軌尋舊游至以六月諸僚間相邀泛舟大明湖芙蓉盛開舟行翠蓋間自謂身在水僊之國渚汜間時有村落忘在城市一日遂放舟出水門至華不注山而止城北古木蒼然清溪印月一時幽興言不能狀竊謂錢唐西湖不足以過也華不注為歷下主山諸山環伏此獨孤秀山以遠而妍此山純石不樹而黛色可挹遠近皆妍趵突泉今為午

道數因送客至焉喬白巖嘗因游此而起尋源王屋之興蓋王屋山至高而險沅水發源其頂入太乙池而伏九十里復見為東西兩源所謂東流為沅者也俗傳沅源能出物以應人之求然率於三四月間蓋春夏之交泉脉騰沸而沅尤勁疾物隨沸而上故餘時即否無他神異也再出為趵突泉曾子固謂嘗有棄糠於黑水之灣者而見之於此正與沅源事同然子固謂岱北齊東南諸谷之水匯於黑水柏厓之灣至於渴馬厓下泊然

而止潛流地中北至歷城之西復出為趵突泉而不明
言其為泲水然歷下發地皆泉實皆泲所過也渚為大
明湖注為濼水分為大小清河皆泲水也唐李賢謂泲
自鄭以東貫滑曹鄆濟青以入於海然則人稱絕於王
莽時非真絕也山東苦溝洫之政不修儲泄無法故
旱潦無備可耕之處往往棄為蒿萊歲一不登民輒流
移須朝廷加意責成監司守令有以為之處而後可東
三府差勝於西三府然總不如河南也山東人人習

武雖五尺童子亦能射有能修太公管仲之政他日未必不如李抱真雄視諸方也臨清南北襟喉山東巡撫宜建臺於此以鎮之北敵嘗窺覲宜有以伐其謀至賑饑之法須徧入村落沿門喚集給票注簿示有期日使按期而來不併聚一日然後依次給散則里老吏胥不得作弊而窮民得沾實惠庚申年山東饑巡撫奏准發粟賑貸予以此法行之又設粥於寧陽親往監視同僚多謂其過予謂朱晦翁在浙東單車却導從窮檐之下

無不到故民隱無不知今猶患不能如此豈過耶景
王之國道出山東舟大小千艘用夫二萬餘用七道民
壯皇筏夫沿河接遞夫猶不足量派裏縣鄉夫予慮其
擾則命鄉夫且緩派憶昔為行人出使見夫役有一程
接代不至便曉曉有言及與顧錢則連行數程不稱困
乏因知沿河顧募便可取足白于巡撫請盡罷鄉夫巡
撫初未以為然及聞前路鄉夫被王舟人逼索剝奪有
投水溺死者縊者逃者蓋鄉夫頗有衣裝又恹懦故舟

人得肆虐乃如予前議彼汾河人皆積猾衣縷蓋形不足腰裹三升煤炒錢十數文舟人無所索王舟自平原至沙河二千里一用雇募費省而人便半月而出境有司可委托者多為同僚所占不欲與之爭刺下典史驛丞素署下考者予因呼而用之至則激之曰汝等自新之機在今日皆叩首願自効蓋王府人役非此輩不能與之言有以塞之使之安靖而過民不受擾足矣臨清知州為王府人圍逼至欲自戕王舟夜過某閘束燎

不續致問巡撫巡按安在孟知縣至於被鎖此可見矣
汶水自古東北入海以智力導引使南接淮泗北通
白衛實創自元人而成於我朝二百餘年歲漕四百萬
石按期而至南北三千餘里官私一航閱月可達物貨
相輸有無相濟故漕河國家之津脉有不通當求所以
通之之策若欲舍此而他求縱曰可濟猶非至計況必
不可成如近日膠萊之議乎凡為漕河之患者有二曰
泉流之微也曰黃河之決也泉流之微起於泉政之廢

向也凡係泉源所在疏導以時沿河水櫃閘堰儲泄有
法尺寸之水盡為漕用故以一汶之流濟千里之運而
未嘗不足後七十二泉閘多堙塞儲泄之法悉不如前
此可諉曰問諸水濱哉至於黃河決而南北皆有害決
而南則徐沛淮揚受其衝而祖陵尤可虞此莫大之患
而人猶狃目前之安卒無善後之策決而北方憂其害
漕而又憂至於廢漕曰廢漕者繆說也余闕固云人言
黃河北恐會通之漕廢吾謂黃河北而會通之漕不廢

何則漕以汶而不資於河也此言可謂盡之然河勢若北而衝入會通則閘座皆廢幸而通流則舟行閘面一日數程暫若快意不幸而橫決有決有塞至於斷流舟楫不通而水櫃閘堰素費工力者皆為所壞修復甚難此則害漕為勢所不免故人言引黃河以濟漕如調狼兵以殺賊誠切喻也然河固不可引以濟漕河未嘗不可導之使北何也天地之有四瀆猶人身血脉之有大經絡瀆者獨入於海也今河淮併行河奪淮之道至於

泛濫猶人身血脈經絡此豈可謂天地之常也哉河水重濁號為一石水而六斗泥下流少緩上流必淤是以海口積成大沙以河淮併行淮道隘小去不迅疾之故也今海口之沙不可去上流縲築隄防約攔水勢安能永久無事欲永久無事惟有縱之使北而已或曰河淮併行幾年於茲矣非不欲使之北不可北也吾謂不然所謂不可北者若謂利害有不可則吾前既言之害漕之害孰與祖陵之重智者尚當權其重輕況河雖北而

漕可無害尚有策乎若謂河性不可使北則尤不通於理不達於河勢矣漢時河有徙決止在北方去禹故道未嘗相遠漢武帝元光中河決於瓠子東南注鉅野通於淮泗武帝親臨決河公卿負薪卒塞瓠子築宮其上名曰宣防而導河北行二渠復禹舊迹而梁楚之地無水災平帝時大司空掾王橫言秦攻魏決河灌其都決處遂大不可復補宜徙完平處使經西山足東北入海是前代定論固惟以復禹舊迹使東北入海為是矣後

世不能如武帝遠見決意瓠子之塞所以多河患孟子
曰禹之治水水之道也後世失其道而南豈河不可使
北哉或言禹九河故道在今滄瀛景德之境密邇神京
奈何引河患使近哉吾謂兩京俱為根本重地以祖陵
言則南之害迫而難緩議以地勢言則北之害猶賒而
可預圖況太行西繞黃河又來朝拱京東鈐鑰益固豈
不有助於神京之壯反謂延患使近哉夫黃河治則不
難於修復漕河漕河復則不必復言海運今膠河之議

雖罷海運之險尚未有極言其不便而止其議者丘文莊公海外人故專言海運之利彼所計損失之少者歲到之米數而不知海中漂溺之事無日不有太倉但責歲到之數無虧而不問其他有司預有損失之虞安能無倍贏之輸而舟卒民力元人視為痛痒不知者安嘗一一報之官而書之史乎以近日徐沛間黃水泛漲之時猶有漂失乃改冬底起運以避此而況海中乎長運之軍歲無休息復驅之海情將不堪勢又及民兵民俱

困矣借曰募其願者寧有幾耶故閘河必不可棄海運
必不可行閘河惟通故南北貨物交輸官私船隻絡繹
兩岸人民輳集兩京津脉相通所以為國家全盛氣象
若行海運則閘河必以無用而廢閘河以無用而廢則
南北貨物官私舟船寧能如前日之通行乎兩岸人民
必以無業而去寧復如前日之輳集乎自此浸成蕭條
豈國家全盛之氣象乎或又言兼行海運非欲廢漕河
也漕河或有遲阻此不至而彼至且因以習知海道不

亦可乎此又計之左者也聞太倉已有數年之儲漕河
或有遲阻自有轉般之法可行何事而兼行海運幸冀
於此不至而彼至于況自經倭亂以來人心日壞盜賊
之變在陸地猶難盡防海中之事尤不可預料吾恐自
此生事而習知海道之人欲為寇備而先以啓寇元人
之鑒固未遠也膠萊河者源出高密縣南自膠州分
流北至萊州府海倉入海自膠抵萊故名膠萊自淮入
海風帆一日夜抵膠入膠河至海倉入海風帆二日夜

抵天津通計海洋之中不過六百里耳元人疏濬欲以
避東海數千里之險以末運兵梗而止入我朝士大夫
以海運有風波之虞漕河或有意外之阻多言可開此
以為餽運別道而朝廷未曾試其利害萬歷中用尚書
劉公應節之言試而難成乃罷自是膠萊之議息矣因
記於此諺謂此河為銅幫鐵底難於開濬又難於通津
舊議所以為通津之策者有二一曰兩頭海潮一曰中
路泉濶今勘河高而海下勢本難通又南潮止及陳村

閘距海口二十里北潮止及楊家園距海口六十里遇風迅潮疾或至朱鋪亭口不可為常且潮水倏忽長落運舟寧無守候耽延況潮之所及有限乎此通潮不足恃也泉灤之說初謂沿海郡縣凡沅泉湖灤皆可如漕河引泉之法以時䟽之賴以為膠河之濟一曰沽河源出黃縣一曰張魯河源出高密鐵樞山泉水所聚名曰都泊即公孫弘牧豕處周百餘里中隱二三十泉可濟分水嶺之艱一曰濰河水勢極大冬夏常流亦名淮河

諺曰膠翁淮母無媒不偶此三者實膠萊河之命脉也
今勘前項河濼最下之地為秋潦所歸十月以後日漸
消耗至春月泉脉微細適糧運湧到之時雖置櫃建閘
終不能使之源源而來此引河不足恃也乘潮引河皆
無足恃又况瀕海之地多積沙下多碕石沙在海中
者潮水湧進沙必隨之而入沙在地中者畚鍤所及沙
必隨之而出土可蕩盡沙則下沉非挑除所能絕亦非
堰閘所能障也至於碕石入謂雖不能入此又難於挖

沙矣庚申冬與叅政林君登泰山初十餘里皆高岡
至回馬嶺始峻拔車馬不可上坐板輿用伏機可轉數
人扛之二人挽之前者見後人頂後者見前人履底而
坐者常平計三百四十一盤四千三百七十四磴初望
高峯刺天有白雲縹緲其間以為絕頂及到天關又在
蹊下下瞰神悚至頂尚十里也時當雪後初晴千山之
巔猶白下視一氣混茫上下一色恍如身坐水晶宮因
詠南軒張先生之詩曰人立千峰秋色裏月生滄海暮

雲邊噫大哉游乎日觀峰五夜見日出唐人言交州望
南極纔高二十餘度八月海中望老人星下列星燦然
明大者甚衆乃渾天家以為常沒地中者也人以平地
見日出而疑日觀之事正猶未到交州者不見南極下
星爾林君問予孟子小天下之說予曰泰山特起東方
青徐兗豫適旋其趾人目力有窮使有神人立此俯眺
八荒則恒華嵩霍直相拱揖爾太行如几河江如帶皆
歷歷在指顧間林君笑而不語又問天下之山無高於

五嶽者乎子曰以泰山觀之陟而始知其高入而始知其深奇峰峭壁乃隱乎迴巖複岫之中其勢之來者遠而鬱盤者厚是以爲諸山長雄臣僕後先而子孫環擁匪直以其高也意五嶽皆然不然五嶽之外有他山尊者矣子因又論古者山川之祀壇而不屋今乃人其形宇其地又元君縱是僊靈不知於泰山何與使嶽神反若失位皆不合祀典所當釐正秦漢之君以不過風雨得上封成禮爲天之殊貺而今齊民雜揉褻瀆已甚亦

所當禁欲行而未暇也自至山東欲恭謁闕里而非職事所經不得特至明年春始得至焉當別為記尋以謝病歸不復補茲為闕事云

檇李記

嘉靖辛酉予自山東謝病歸凡十有三載萬厯甲戌再有浙西之命浙江久不設巡撫自有倭寇始復設而溫台寧紹杭嘉邊海之郡各設兵備杭嘉湖兵備駐檇李叅將駐海鹽備倭把總駐乍浦至汛期把總出哨羊山

海洋則兵備叅將並駐乍浦陸兵一營兵備標下中軍
官領之水兵船百五十艘分為三枝各設水兵把總一
員統之一泊澈浦黃道廟謂之上關一泊海鹽白塔港
謂之中關一泊乍浦西海口謂之下關大小汛期輪撥
兵船遠出羊山許山與浙東臨定直隸吳淞兵船會哨
澈浦在海鹽之西宋元時通番舶之處城周九里有餘
軍民雜居不及三之一人少不足以實城春汛時巡撫
發標兵一枝以協守且備東西應援秦駐山距澈浦海

鹽各十八里與浙東臨觀相對白塔山大步山左右環拱巖內宛轉可避風濤海鹽居中兩浦為左右翼乃攜李之屏蔽也乍浦屬平湖元時番舶萃此洪武初建城設守但孤城懸築平沙之上湯山臨城敵若據之得窺虛實城廣如澈浦軍不滿千派運糧餉又遠糧戶不運本色西海口舊天妃宮開浦置閘汎畢收泊戰船於此自倭亂平三關改為四哨白塔港為一哨兵船九艘哨官一人領之乍浦為一哨兵船八艘叅將中軍把總領

之許山為第二層門戶立為一哨用蒼船二艘沙船小
哨船八喇唬船共十六艘水兵把總一員領之以羊山
為第一層門戶立為一哨用船如許山之數以備倭把
總親督領之欲錢唐無虞當守附海之三關欲三關有
備先防大海之羊許但羊山去許山一潮許山去乍浦
一潮緩急難相應援且蒼船二艘兵夫僅六十二人沙
船四艘兵夫僅百八人小哨等船兵夫共百九十人以孤
踪守此恐瞭望不及備禦不敷倘海賊有不由羊山徑

入內洋者則首尾不相顧矣隆慶元年有胡叅將者汎夜巡城忽見外洋大船無數此時守羊許者固不知也倭船入寇必至下八山分艚若東北風猛則向馬蹟西南行過韭山以犯閩廣若東南風猛則向殿前羊山過淡水門以犯蘇松若正東風猛則向大衢西行過烏沙門以犯浙江而羊山正浙直交界之處兩處兵船會哨於此倭奴因糧於我每人止帶淡水數觔乾糧數升若絕其汲道堅壁清野使無所掠其計自窮矣海東之國

日本為大五畿七道固彼侈言然漢史固已云百餘國
矣豈古分而後併與然雖聞有王亦不能統一其衆貢
者其名市者其實寇則無常視吾有間無間耳亦多吾
人誘之無接濟不來也嘉興水兵以喇唬船一十四艘
民壯兵二百餘名於嘉興裏河一帶巡緝鹽盜汛期調
發西海口白塔港以備遏擊之用汛畢掣回仍舊巡緝
鹽盜抗嘉湖三郡河港四通鹽盜不時出沒前船徒有
巡緝之名多分散各處虛應故事一遇賊勢重大便稱

衆寡難敵予至則不許分散督令合縣定與信地某日
起某止某兵分一正一奇出哨還日面詢有無盜賊曾
否擒獲皆不能隱自此屢有擒獲乃知盜賊是惟不緝
緝則無日不有緝惟不嚴嚴則何盜不靖閭閻被劫止
因保伍不嚴保伍若嚴盜無着跡之處彼欲劫一家謀
非一旦探聽跣踏潜伏脫退皆有處所此有可入故彼
能來既不能察之於先及盜已入門而四隣不知知亦
不救使盜得以肆劫而去進退無虞若使一家有事比

家聲鐸衆巷皆應之北門壯丁執械而俟盜敢近乎予
在檄李申嚴此令境內頗靖與巡撫論兵事曰自到任
以來據各將領收補到新兵驗多係四外去來無定之
徒有司地隣既不稽察縱使膂力中程武藝出色猶恐
將來未必得其實用况多具數徒滋坐食夫兵非練土
著不可人孰不知而不敢執者以臨敵未必可用也竊
以為當以漸為之必其來歷可知踪跡可保者始入選
則不必拘於土著而土著可以漸復此非稍屬之有司

不可也兵既漸歸於土著而又使訓練有方選鋒可用則漸可使自食其力而兵餉可減民力可寬矣巡撫雖從予之言而不能推行予之意但以收兵屬之海防同知仍應故事爾錢唐江鳴潮楊子江暗潮欽廉日止一潮瓊海潮半月東流半月西流乃隨長短星不應月柱林聖水巖子時潮上午時潮落大抵氣有翕張則潮有長落天地之有水猶人身之有血也水由氣以往來猶血循脉以流貫也時刻不與即一息四至之期也大小

不同即春洪夏弦之道也日止一潮或半月東流半月
西流者亦猶兩躡之與兩手遲速大小所見不同也沿
海衛所專為備倭例不運糧浙西之海寧即浙東之臨
觀諸衛自指揮莊端謀領杭州衛運船四十八艘彼時
猶承平無事嘉靖三十二年倭船四十二艘突犯海鹽
龍王塘攻城幾破巡撫乃查復舊制至隆慶二年腹裏
湖州所復扳與本衛一十二艘近日指揮姚磐以為言
巡按蕭公一時未察未及正也浙東人習於潮性水勢

他處人下海即吐浪眩暈故雖吳地亦募彼處之人且南人懦弱彼獨勇悍故南自閩廣北及薊鎮皆募焉然人一為兵則身不可復還於農而聚者不可復散他日未必不為隱憂以兵而為賊其衆不待招而聚其技不假教而精聞薊鎮南兵非能衝鋒禦敵也衝鋒禦敵仍須北兵則南兵何藉而富厚加之獨無蓄不平之憾者乎各處水陸要害之處設敵臺所費不貲誠以事關防守而事寧之後上下全不經心多就廢壞予嘗理會及

之尋以遷官不及竟也海鹽一帶海塘外以捍海潮之
入循塘拒守墩堠相望可以禦海寇之登犯塘以裏皆
良田富室煙火相望所恃以為外護者一塘而已石塘
縷砌縷砌者用石方尺餘長八尺或六尺縱而磊之取
海潮衝撼不動內厚築黃土以襯之高與之齊厚必五
倍之若少工力石可衝撼潮必內侵石塘有罅土塘必
壞土塘內潰石塘不能獨存予與叅將閱操因諭衆曰夫
戰勇氣也勇怯在人所稟此豈可以操演而得操演所

以演習紀律紀律所以為戰用也今日之操便須作真戰用如李廣夜遇虎不知是石射之一發沒羽習成此等心力乃不枉却試言今日布營走陣之時猝有寇至能不動乎不亂乎亂則有技擊無以用之故操演務在得其所以不亂而不在于區區技擊之間旗鼓行陣所以操其耳目方員合散所以操其步武刀矢鎗法所以操其巧力用志不分所以操其心膽古人操其外所以操其內今人不知操其內其所以操其外者又未必如

法衆請言不如法之事予因言適來鎗手牌手各上臺
演訖一套何處見得能否須鎗牌相角始見勝負在鎗
手以能中為勝在牌手以鎗不能中為善又如射古人
云必志於穀又曰省括於度故入初習射去勢直者謂
之箭苗今汝輩高大其塚短其弓步箭勢多高矗反下
戲撞之數何以望穿楊貫蟲之技乎衆皆服曰善富陽
以東山凡三折形如之字江流隨之故名浙江蜀峽以
幽此以麗其山水之清絕則一也陸至富陽循江瀕山

趾道旁時有村落竹籬茅舍亦自不俗西興裏河用小
舟可以盤壩兩岸青山不絕山下平疇遠村時隱時見
炊煙與嵐光相接人家夜戶不閉舟中簾捲兩面對
忘倦越中山水之佳不可名狀南充王憲副續之嘗曰
山形止越山有動意縉雲僊都亦奇境也峰巒秀絕溪
澗清駛人家堰石子截湍流以作水碓自春水磨自轉
甚巧一峰拔起於地高可百仞人云頂上有石池夏月
嘗有蓮華吹墮云同遊者邑人藩叅樊君獻科憲副鄭

君文茂浙中無隙土但田少爾然利源儘多可不資於外

符臺記

萬曆乙亥四月自浙西召為尚寶少卿以八月至陞見
伏睹天表甚晬語音清亮奏事皆親答且聞於講筵頻
有所問具見睿性闡發謂宜因而導以講學勤政之實
學不在章句如程叔子為說書乃今日講官模範勤政
未論其遠只如我孝宗皇帝日召大臣於便殿商議政

事或於朝退或不時召見凡大政事大黜陟刑賞與各處奏報地方重大事情令所司逐一面陳作何處分於是內閣擬旨皆君臣面定使上益明習於天下之事今經筵衍訓一章日講摘說一段止在文義口吻之間略無感動開發之實恐不足以輔成聖學而常朝奏事日限數起答以一語儼然而退君臣之間情意不接竊謂古人朝而聽政晝而訪問夕而修令其在外親政治近正人之時多而退居深宮之時少則逸豫無自而生今

內閣調旨六部擬議上虛已受成固可以無誤然非所以習上於憂勤而經練於世事也周官有典瑞今尚寶之職也周官宮正宮伯掌宮中之環衛直宿為之名籍比其在否今每日查點守衛官上自勲臣皆赴司押字凡直宿侍衛有違悞者本司得糾奏猶周人之意也定額卿少卿各一員丞三員洪熙元年以蹇義子蹇荃為尚寶司丞大臣蔭子為丞自荃始宣德五年以夏原吉子瑄為尚寶丞食俸不管事正統元年瑄陳乞管事陳

乞管事自瑄始然則祖宗以來恩蔭增設止於為丞猶
不管事後雖管事計其升擢必有所限嘉靖中嚴世蕃
乃升至侍郎掌司事後徐璠升至太常卿不掌司印璠
弟琨以少卿九年考滿加四品服俸不掌印時掌印者
予也司中故事漫記一二永樂十九年都督蘇火耳灰
被召不解刀為本司少卿張偉所劾奉聖旨當初長孫
無忌是唐太宗舅宣他誤帶刀上殿也罪了他我使他
出去罷又永樂十六年旗手衛指揮上直不到經歷開

稱患病本司劾奏奉旨把那經歷收下錦衣衛着太醫
去看那兩箇病的指揮委實病饒他說謊剛了守衛之
嚴如此御寶舊置者十有七曰奉天之寶郊祀用之曰
皇帝之寶詔敕用之曰皇帝行寶冊封賜勞用之曰皇
帝信寶詔親王大臣發兵用之曰天子之寶祀山川鬼
神用之曰天子行寶封外國及賜勞用之曰天子信寶
詔外國發兵用之曰制誥之寶制誥用之曰勅命之寶
凡勅末云故諭者用之曰廣運之寶凡勅末云故勅及

黃選勘籍用之曰御前之寶御前雜事封識用之曰皇帝尊親之寶冊上尊號用之曰皇帝親親之寶賜親藩書用之曰敬天勤民之寶勅諭來朝官用之曰表章經史之璽曰欽文之璽其曰丹符出驗四方者則鈐勅封者也太祖高皇帝御製尚寶司官誥曰寶乃乾符也昔列聖握而統寰宇故為神器特謹以示信然非忠勤無偽之士安可職於尚寶者耶誥今勒石朝房諸衙門事必商之於內閣其來雖久然使九卿能守正執議內閣

亦無如之何如吏部陞官內閣欲有所私而吏部不肯
弘治以來此風猶存高新鄭欲快己意以內閣掌吏部
事者至於數年大略快恩讐及為門生狎客開騙局者
甚多也萬歷丙子某月御史劉臺疏劾大學士張居正
罪狀一謂傾謀逐去高拱一謂私許成國公朱希忠身
後卹典一謂援引張四維入閣張瀚入吏部一謂創為
隨事考成之法欲以總攬威權及因御史俞一貫不聽
指授借回道考察之例謫調南京一謂遼王獲罪遷發

居正有力一謂居正諸子黃緣科第一謂湖廣鄉里親戚及官於湖廣但為居正所私厚者無不拔置要路一謂排抑言官一謂於原籍大起私第騷動一方一謂黃州生員之事以私意擬旨重處一謂居正之貪不在文官而在武臣不在腹裏而在邊鄙䟽上居正上章自辯且求退有旨慰留而劉御史罷為民後張竟事敗有劉䟽之所不盡者一朝發露無餘蓋自慰留之後心膽益大至聞父喪不肯丁憂其心死已久矣安得不傾覆哉

內閣無公座惟東西兩兌相對尚寶司獨設公座亦東西相向到任之日守衛官庭叅皆坐受朝退侯伯赴司畫字送迎止簷下仍候本司官入闕乃退尚寶司之西近城角者為六科廊相傳六科舊亦在內不知何時移出於外今六科署事之處乃直房也亦無公座震澤長語謂李文達自吏部入內閣欲正南向之位彭文憲阻之謂禁中無南面正不知文淵閣乃大學士辦事之所非翰林內署之名翰林院已設有諸學士公座故內直

無之不但以禁中無南面而已假令國初設內閣時便
定為內署許設公座亦止當如尚寶司東西相向無南
面之理李文達固一時不考而彭文憲亦不及此何耶
南京魏國公家以太祖嘗幸其第至今中門不開中堂
不坐豈論事久近哉

蔭河記

金壇之浸洮湖為大環湖而居者五葉為大五葉舊名
墮庚以星隕得名去湖心大涪山約十里許元至正間

遺碑猶在今尋墮庚故趾已淪湖中而自五葉望大涪則遠幾二十里矣蓋由湖水衝激侵蝕而然湖在金壇之南袤百餘里又名長蕩湖與宜興溧陽分界上流則方茅諸山之水近則白龍錢資諸蕩由大浦方洛下湯燕瀆湖頭諸港以入焉所入既廣而由宜興入太湖所從泄又太迂緩故瀕湖多湖侵之患舟遇風浪多覆溺之患冬月又涸不可舟而有事於縣邑者又無他水道可達由陸則官私輸將之遠負戴之勞無如五葉者民

之病此久矣萬厯庚辰議濬蔭河一道取外可以避險
內可以通舟以其土厚築陂防栽植蘆柳又可以杜湖
侵之患於時人心尚未協會農事興中作而罷至邑侯
東陽許公下車首問地方利病具知前狀旬日間一再
臨其地親行相度又設募夫法人甚稱便乃分地賦功
集一方之力而人不知自方洛港至湖頭港五十餘里
踰月而工成父老以此役非許侯不成又慮久而脩濬
不時或至於廢必分地而任其事河有堙塞則疏之蘆

柳有疎薄陂防有缺壞之處則修之禁其不時採伐者
勒石立之道旁庶可以垂久遠而請予為記予惟古者
川有䟽導澤有陂障田有溝洫皆掌在有司以為民政
所急而不敢少慢至於兩漢猶知以河渠為重若召信
臣守南陽時行視郡中水泉開通溝瀆以廣溉灌民得
其利蓄積有餘載在循吏傳以為稱首而後之君子罕
復究心焉或行之而不善如妨奪農時起役不均賦功
無法以一方而騷動一縣或輕信偏聽興難成之工或

利於此而害於彼則未為民利而先為民病如近年之興水利其得失蓋難掩於人口也許侯於動衆之事必酌於人言合於衆願然後為之故動而有成成而為利如此昔夫子之論政以為因民之所利而利之則惠而不費擇可勞而勞之則勞而不怨以此為五美之二豈非從政者之法程與予故因父老之請而詳為著之許侯名弘綱萬厯庚辰進士先任績溪以賢能改任金壇先後五載入覲首膺卓異之典還治未幾即內召既行

而王生尚廉雅好義實來為介以許侯之德尤不可忘
贊予為記云

遊茅山記

易曰地勢坤高下相因地勢則然但人不覺耳由平地
而有丘陵由丘陵而有山嶽人在平地望遠山其高下
相較若不相遠至登最高峯則向之所見皆出其下有
若培塿者金壇在茅山之東盡處由縣西門出可三十
里始有陂阬由此至茅山四十里皆長岡起伏不斷漸

進漸高茅山乃從石上起峯爾山勢行而不止大勢為
金陵拱護萬厯癸未四月與吳郡繆仲淳約同遊仲淳
與子仲子肯堂先一日往至所謂良常山者俗傳秦始
皇所臨幸處山不高亦無甚奇絕疑非古之所謂良常
也次日與仲淳登第一峰絕巔俗名大茅峰恰憤山俗
名了髻山正與第一峰正面相對方山宛如几案訪所
謂龍池者在真君殿側方廣僅數尺水且涸矣疑宋時
禱雨求龍處不在此也東口戴家山有泉一道出自第

一峰下至石子澗奇石巉巖水行石間春夏有雨時水
勢尤盛景韻尤奇雖近在道旁而人不識也山下富人
引水作碓磨又因以溉田予與仲淳入孔氏別業觀水
磨甚鉅挽非數人之力不能動乃知水勢盛時磨自轉
水力之勁有如此也又泉一道自元符宮下流經華陽
洞名曰洞泉西流至曲林館過崇禧宮側由西風橋下
入赤山湖又泉一道出第一峰後半山天心庵至關王
廟下流經曲林館入赤山湖而有泉仰出於平地者尤

奇宛似歷下珍珠泉俗所名喜客泉者也凡茅山有泉而人不知導引故多堙塞所謂華陽洞者陶隱居云此山本號句曲其下是第八洞宮名曰金壇華陽之天周回百五十里分置三府前漢元帝時咸陽三茅君得道來居於此然則所謂洞天者豈可以塵寰幻迹求哉陶君所謂拓寓地空亘涂水脉闢闡風岫通氣雲巘意非僊靈孰能到而今人稱洞有二一在崇壽觀後一在元符宮東皆無異會稽禹穴人又稱洞口有石拚塞愈入

愈寬予皆未及試也洞上樹生石罅有似純石無土洞
泉至五雲觀前匯為方池池側有連理木上合下開至
紫陽觀訪道人左熙本山西人商遊江左家遭地震
之變無家可歸遂學道入茅山紫陽觀閉關不出者數
年近復結一小庵於舊廬之旁晝夜危坐一龕有終焉
之志云按茅山志云秦始皇登句曲山北垂嘆曰巡狩
之樂莫過山海自今以往良為常矣羣臣皆曰良為常
矣因名山曰良常山據此則良常此句曲也今所謂良

常者去茅峰十里又甚小乃俗傳誤爾

姜氏義學記

義田義學其事相因猶古者有井田必有學校而自王公以下至於士庶人又莫不有宗法以收族是以人心有所維繫而教養之法得以行焉程子曰宗子無法則朝廷無世臣又曰立宗非朝廷之所禁但患人自不能行之張子曰宗法若立人人各知來處朝廷大有所益蓋公卿各保其家忠義豈有不立忠義既立朝廷之本

豈有不固今公卿崛起者止能為三四十年之計造宅
一區及諸所有身後遂族散其家不傳則家且不能保
安能保國家二先生之言可謂深切夫有宗法則無私
財無私財則安有義田之名義田蓋起於宗法之廢而
欲通其有無以統理族人則猶有古之遺意也古者閭
黨猶相收恤況族人乎春將出民里胥平旦坐於右塾
鄰長坐於左塾畢出然後歸夕亦如之入者必持薪樵
輕重相分班白不提挈是古人之於民出作入息必有

教況其家之子弟乎宮保太宗伯鳳阿姜公能以宗法
統理族人又置義田以贍不足設義學以教之疏請於
朝特蒙俞允則程子所謂宗法朝廷所不禁但患人自
不能行之者公可謂能行之矣辱不鄙以義學見屬為
記公凡事以身為教族人所素信而從奚待於不佞之
言雖然若因公之倡家家有同公之志者則張子所謂
於朝廷大有所益者未必不於今親見之也敬以是應
公之命為義學記

南京大理寺題名記

刑官在虞曰士孔安國曰理官也在周曰司寇而其屬
仍為士晉文公使李離為理理猶士也秦始置廷尉漢
景帝更名大理武帝復為廷尉哀帝復為大理後漢晉
宋復為廷尉隋唐復為大理名雖數更所掌則一自三
省九寺並設有刑部而又有大理刑事所主頗不一至
我太祖高皇帝稽古建官六卿分職又設都察院通政
司大理寺通為九卿各舉其職毋得相壓載于祖訓刑

部都察院大理寺號三法司周垣象天之貫索曰貫城
在京師者於宣武門之西在南京者於太平門之北凡
刑名之事必歸法司他司無得干預而大理專主審覆
兩法司之事情法未合罪囚稱冤駁至再三必歸于平
允而後已則尤我聖祖慎重刑獄之深意也其勅法司
欲其以身心法天道獄清而無事心靜而神安以玄武
之澄波印鍾山之蒼翠雖飛巢顛而走窩下亦莫潛毫
釐其以為刑官察見隱情之譬也為訓至矣故事列官

題名於石而虛其左方自洪武以來凡若干人豐城楊公嘗有記萬歷癸巳前任卿烏程沈公之後左方已滿議再立石不佞適承乏嗣事宜識歲月以俟將來乃本楊公之意而為之申言曰河東薛先生文清公本朝理學名臣之冠其立朝本末具載國史而其為大理也知有法而不知有權勢知為天下持平而不知有身之禍福此其所由來者深矣執法殆不足以盡先生也先生嘗以敬名軒竊窺先生之所以造道成德與所以施之

蒞官及物者皆有得於此先生之學有得於敬在理學諸公之言可徵其體驗之言則具在讀書錄中書曰式敬爾由獄又曰敬忌固有擇言在身此又非先生之所以為法官而能心乎臯陶之心者乎聞之先儒曰心在焉謂之敬凡事皆然而於刑尤重故曰君子必盡心焉盡心者非止於不失有罪也惟刑之恤求其生而不得刑期於無刑如是而後盡也此臯陶之心也先生以景泰初嘗任南寺寺丞莆田黃公輦嘗大書敬軒二字榜

於廳事以寓仰止之意樵謹再立於寺之後堂樵於二
先生無能為役竊謂黃公之榜詔我實多朝夕瞻對服
膺勿失庶於聖訓身心法天獄清無事應象貫索之意
為無負云敬以質之右丞嘉禾朱公朱公是之遂為之
記

敬軒記

薛文清公嘗任大理故寺之後堂及官舍皆有敬軒
之榜說具予題名記中予以萬歷壬辰十二月自光祿

徙官進而蒞事退而燕居皆與敬軒相對嗚呼於斯而不有所進則有負於此來職思其居學之大者即日用應接學不學之人所趨異焉有其事雖小而心在焉則中理心不在焉則差繆隨之察理精者慮事審況其大者乎甚矣學之為急也學者存心致知而已存心致知之道敬而已義理人心之固有苟得以尊嚴國家教化之宮而變其學者之耳目者於此不為無助也詎不信夫又於蒼龍之方建坊以表俊造之升進者坊本諸臺

為姜公建姜公譙不以自居而公諸學通列前後諸名
流於上辱學諭朱君以書來見屬為記蓋以樵在鄰壤
為能知其國故而有以示諸後也顧不佞豈足以承之
既辭不獲乃拜手而為之言曰昔魯侯作宮泮水有頌
今穆穆在上明明在下凡所興建皆奉宣德意無非天
子之功詩曰明明魯侯克明其德既作泮宮淮夷攸服
矯矯虎臣在泮獻馘淑問如臯陶在泮獻囚古者文武
一道使民興賢教民即戎皆出於學故受成獻馘莫不

在學今天子克明其德出魯侯萬萬雲陽之士被豈弟
作人之功無愧撲棧之詩所詠又豈魯之多士所能望
其髣髴將來輔佐休烈允文允武惠此中夏伸威漠北
獻馘獻囚必由學出其時有思樂泮水而作頌者必以
茲舉為兆以吾言為徵是奚可以無紀也朱君名邦喜
大器當遠到董是役者為楊丞名某學事非有司不成
例亦得書萬曆十九年夏四月十一日記

閩外城記

萬曆二十一年十一月二十一日同內外守備叅贊部
臣閱外城予以攝工部事出太平門尚書徐公以攝兵
部事出神策門予以五鼓盡至觀音門官廳俄而守備
邢太監泰寧陳侯相繼至既而尚書徐公至黎明循垣
內東行垣皆國初蒸土所築極堅厚上以蜈蚣木出檐
覆之以瓦歲久土有剝落木瓦有頽壞則脩之至今垂
三百年外郭周百八十里包羅山谷誠前代所未有也
北面一帶因山為險據江為守自觀音門而東繞鍾山

之後而左皆岡阜不斷在東北曰姚坊門又南曰僊鶴門又南曰麒麟門地勢漸平鍾山側看成峯橫看成嶺攝山後峙青龍左繞石城右距天印為案於此行頗得其形勢之的而知我聖祖於金陵定鼎於鍾山卜吉以為萬年之藏聖鑒高遠非尋常可窺也是日由南出者為協同守備劉監丞定西蔣侯起鳳臺門又東曰夾岡門又東曰上方門又東曰高橋門南北兩路同會於滄波門有官廳曰閱城會所內外守備兵工二部堂序坐

飯畢予與徐公入朝陽門道中審見鍾山蜿蜒扶輿衆山環拱南面空濶秦淮流於前大江繞於後沿江諸山又皆遙為金陵拱護其面勢與尋常所見不同蓋從高而下始得之也歸至工部與四司官議修城事頗言修內城易脩外城難內城縱有崩壞舊甃多存用甃灰脩補新舊即成一片勢自堅久外城原以土築土有剝落用土坯幫砌不久即壞後易以甃土外幫甃雖可暫支一時而甃土原不相入尋亦崩壞若欲永久不壞須如

北京外城一如輒城之法裏雖用土築外則用輒實砌非幫砌之比故得堅久但北京外城止南三門一而南京外城則連亘遼濶其功實難周書畢命曰申畫郊畿慎固封守周禮大司徒乃建王國制其畿方千里而封樹之有掌固司險掌疆封人之官掌修城郭溝池樹渠之固頒其士庶子及其衆庶之守郭即今之外城所謂溝池樹渠之固恐大略如今邊牆之制有牆以限隔有墩臺以瞭望拒守有渠以環之有樹以固之牆之比城

易脩而亦足以為守比城易脩者以用土築而不用軌也欲其足以為守須備前所云四者而後可以經久則在當事者以意損益而已

閱內城記

是月二十五日閱內城內外四守備兵工兩部堂會於通濟門黎明登城如前分閱劉監丞蔣定西由西歷聚寶門三山門石城門清江門定淮門儀鳳門予等由東歷正陽門朝陽門太平門神策門金川門鍾阜門而會

於淨海寺寺在城外據獅子山趾獅子山在城內即國
初建閱江樓處是日頗盡金陵大觀蓋內外遠近畢見
也通濟之外秦淮為池雉堞不甚高徑不甚濶僅容兩
馬俯視甚峻而基實弘濶瓴甌兩面厚可丈餘而附墉
之土則長坂天成濶十餘丈雖不設敵臺亦無慮也至
正陽門下輿而過旭日初上朝煙未消南望郊壇北望
大內如在圖畫自朝陽門而北則鍾山在外隆廣山在
內城貫二山之間包山而過孝陵中松柏參天谿谷透

迤歷歷可數隆廣山蓋鍾山之支隴石崔巍亦多古木
有巡山官軍跪迎山上道中見松柏枝幹多作虬龍之
勢皮似鱗甲在動植二物中恐亦得氣之相類者歟城
隨山勢此處獨高歷級而上東北折處為孝陵後門自
此而西至太平門城皆在岡隴之上太平門居隆廣覆
舟二山之間門外長堤數里為三法司面城臨湖而在
鍾山之趾玄武湖在覆舟山之後城亦包山而過自此
至雞籠山岡隴不斷城皆因山而臨湖湖逼山趾城與

湖相逶迤蓋至雞籠山之盡城不復西別築城下循湖而北為神策金川二門蓋至此始為城之極北處也城降於雞籠之後者一等有便門歷級而下自此玄武湖之曲折始得盡見新舊冊庫在湖之中此處最深湖連亘太平神策二門之間環湖村落櫛比土田畦壠方整宛如碁枰自此而西則大江迤邐而東繞出帝都之後逆江而上皆山也江山之險實天造地設傳曰天險不可升也地險山川丘陵也王公設險以守其國設險亦

因乎地險汴為四戰之地所以不可都也金陵以江為
險人之所知而用險之道人或未盡知六代南宋雖偏
安即其保守一隅能却敵而制勝如周瑜王導謝安韓
世忠虞允文者亦有用之之道矣自金川北繞獅子山
於內雉堞東西相向亦建二門曰鍾阜儀鳳金陵在春
秋時本吳地越句踐滅吳築地於長干里俗呼越臺楚
置金陵邑於石頭金陵有城邑自此始秦始皇以望氣
者之言鑿方山斷長隴以泄王氣其河源二一出句容

華山一出溧水東廬山合流入方山埭自通濟水門入
都城南經武定鎮淮飲虹三橋西出三山水門沿石城
以達於江乃今所名秦淮者也東漢末以秣陵地封孫
策為吳侯至弟權據有江東築石頭城因山為險扼江
為守即今石城門一帶尚其遺趾也改秣陵為建業建
安十三年移丹陽郡治建業遂徙都焉都城在淮水北
五里據覆舟山西倚石頭以為重後帶玄武湖以為固
前柵秦淮以為阻今頗言其地實得面勢之正南五里

至淮水有大航門宮之後有苑城晉所謂臺城即此也
赤烏四年東鑿渠名青溪自城北塹泄玄武湖水九曲
西南入秦淮今僅存一曲而已金陵建都實自吳始其
故蹟大畧具於此矣

智居樓記

南京都察院後堂之北有敬亭立洪武八年勅諭碑敬
亭之北有智居樓名取勅諭中語也澹菴朱公創之洪
溪衷公助成之而未有記也按勅諭云肇法司於玄武

之左鍾山之陰此言其建置之初意也又云貫城法天之貫索七星如貫珠圜而成象又云中虛無凡星則刑官無私邪政平訟理故獄無囚而貫內空又云若凡星處其中有數枚者則刑官非人又云若中有星明亮者則貴人無罪而獄此言設置貫城取法天象欲刑官法天以從事也又言獄清而無事心靜而神安以玄武之澄波印鍾山之蒼翠雖飛巢巔而走窩下亦莫潛毫釐動見其真智人居是能不開懷抱而長嘯終日引觴侶

酌以快今生汝其敬哉此言刑官能稱其職斯不負建
置之意也夫夙夜兢兢業業使刑必當罪人不犯法則
獄清而無事心安而身亦安斯可以當智人之稱居是
焉者豈易易哉萬歷二十三年六月蒙簡任右都御史
泣事之暇登是樓則聖諭所狀景象宛然在目蓋鍾山
之盤鬱紫氣之鬱蔥於是樓盡見於遠望尤宜而玄武
之澄波前抱而右繞亦於是得其大觀居是焉者思智
人之義以職思其居將不又有進焉者乎都察院之職

肅百僚貞百度紀綱攸繫世道攸賴其任責蓋又不止
刑名之一事矣樵自刑曹進此懼弗勝焉實書銘座右
以自儆又念前政二公名樓之意不可以不著也因借
為之記萬歷乙未七月癸酉金壇王樵記

延陵吳氏祠堂記

古之廟制上下有等今制品官許立家廟士庶得立祠
堂所祀高曾祖禰則同惟始祖之祭未有定論先正羅
文毅公嘗言人情不忘其所由始故始為宮室者祀之

始為稼穡者祀之始為飲食者祀之凡有功生民者皆祀之況吾身之所始乎焉可廢也予感公此言始立始祖之祠斷自可知者自高祖以上凡得五世餘莫能詳亦不敢妄有援附謹傳信也金壇吳氏相傳延陵舊家正統中樂清公始以宦蹟著事載邑乘家有祠大意頗與予家合一日其裔孫文學宗周來以記請予惟程子嘗言立宗非朝廷之所禁但患人自不能行之今人家始遷及初有封爵仕宦起家者皆可為始祖以準古之

別子又以其繼世之長子準古之繼別者世世相繼以
為大宗統族人主始祖之祭其餘以次分為繼高祖繼
曾祖繼祖繼禰之小宗此立宗之大法人皆可行者也
所貴於立宗者大宗能率小宗小宗能率羣弟通其有
無欲有以統理族人而不使其散越失道也嗚呼知此
者知祠堂之非徒設矣丹陽大宗伯姜公置義田立義
學予愧力未能行姑因吳君之請而以是告之記祠堂
而及宗法者傳曰上治祖禰尊尊也下治子孫親親也

也旁治昆弟合族以食序以昭穆別之以禮義人道竭
矣又曰人道親親也親親故尊祖尊祖故敬宗敬宗故
收族收族故宗廟嚴嗚呼知此則知宗法之有繫於祠
堂矣



方麓集卷七